

Hope-Siloh, Pontarddulaiswww.hopesiloh.tkhopesiloh@hotmail.co.uk**Dathliadau Gwyl Dewi**

Mae adeg Gŵyl Ddewi yn gyfnod prysur iawn yn ein capel gan fod cymaint o weithgareddau yn cael eu cynnal. Dechreuwyd y dathliadau ar fore Sul Chwefror 27 gan wasanaeth arbennig a drefnwyd gan Marie Lynne ac athrawon yr ysgol Sul. Braf oedd gweld ystod eang o oedran yn dod at ei gilydd i gynnal y gwasanaeth. Cyflwynwyd eitemau cerddorol, adroddiadau, darlenniadau a chafwyd cyflwyniad pwynt pŵer ar hanes Dewi Sant. Gwasanaeth bendithiol iawn.



Y nos Fawrth ganlynol daeth rhyw 100 ynghyd i fwynhau cawl blasus iawn a ddarparwyd gan wragedd y capel. Rhaid diolch i Gwenda Evans a'i thîm gweithgar am wledd arbennig. Yn dilyn y gwledda cawsom ein diddanu gan blant yr Ysgol Sul a pharti Lleisiau Lliw o dan arweiniad Berian Lewis. Diolch o galon iddynt am eu cyfraniadau gwerthfawr. Yna fore Mercher tro'r Clwb Babanod oedd hi i ddathlu. Braf oedd gweld rhai o aelodau'r capel yn troi i fewn i wrando ar berfformiadau yr artistiaid lleiaf oll! Brynhawn Mercher 'roedd y capel yn gyfforddus lawn unwaith eto ar gyfer Cyngerdd Gŵyl Ddewi Ysgol Gymraeg Bryniago ac yna i gloi'r cyfan ar y bore Gwener, cynhaliwyd ein bore coffi misol gyda phlant dosbarth Derbyn Ysgol Gymraeg Bryniago. Wythnos i'w chofio!



Gweinidog: Y Parch. Llewelyn Picton Jones, B.Sc., M.Ed.
50 Heol Glanffrwd, Pontarddulais, Abertawe, SA4 8QE
01792 882889 Lpicjones@aol.com

Y Dosbarth Beiblaidd - Cynllun 'Y Ffordd'

Yn aml iawn, ry'm ni fel Cristnogion yn cael ein hadnabod fel 'Pobl y Ffordd'. Fis Medi diwethaf lansiwyd cynllun newydd gan Undeb yr Annibynwyr o dan y pennawd 'Y Ffordd'. Mae'r 'Ffordd' yn gynllun pedair blynedd sy'n annog trafodaeth ffres ac eang ar natur y Ffydd Gristnogol. Dyma'r strategaeth gyntaf o'i fath gan enwad Cristnogol yng Nghymru, a chafodd y lansiad sylw eang ar y radio a'r teledu. Cafodd rhai ohonom gyfle i fynychu'r lansiad i eglwysi De Cymru ym Methania Y Tymbl.

Mae cynllun *Y Ffordd* yn ymestyn dros bedair mlynedd gyda'r themau yma:

- Blwyddyn 1 – Ffyrdd drwy'r Beibl
- Blwyddyn 2 – Y Ffordd y daethom
- Blwyddyn 3 – Tystiolaeth Pobl y Ffordd
- Blwyddyn 4 – Gofal Pobl y Ffordd



Yn ganolog i'r fenter mae cyfres o fideos thematig newydd, sy'n cynnwys barn pobl ar y stryd, yn ogystal â chyfweiliadau gan aelodau eglwysig, gweinidogion a diwinyddion.

Thema cyntaf cynllun *Y Ffordd* yw 'Ffyrdd drwy'r Beibl' ac wrth i ni feddwl am y thema yma mae'n angenrheidiol ein bod yn gofyn y cwestiynau canlynol:

- Pam mae'r Beibl yn cael ei gydnabod fel Gair Duw?
- Pam nad ydym yn ei ddarllen yn fwy cyson?
- Pam nad yw ei neges yn cael ei gymryd yn fwy o ddifrif yn ein gwlad a'n byd?
- Beth yw cynnwys y Beibl?
- Beth yw neges yr Hen Destament?
- Beth yw neges y Testament Newydd?

Mae'r Beibl yn llyfr unigryw yn ein golwg fel Cristnogion, ond tybed a ydym yn ei ddarllen fel y dylem ac yn deall ei neges? Nid yw'r Beibl yn llyfr hawdd i'w ddeall ond wrth inni ddyfalbarhau i'w ddarllen gyda meddwl agored ac ysbryd gostyngedig, fe ddaw y neges yn glir. Mae aelodau'r Dosbarth Beiblaidd eisoes wedi cael cyfle i edrych ar y fideo cyntaf a chael cyfle i drafod rhai cwestiynau. Ac wrth gwrs mae 'na wahoddiad cynnes i bawb i ymuno â ni bob yn ail ddydd Mawrth yn y Capel Bach Bethesda, Llangennech. Byddwn yn ystyried sefydlu grŵp trafod yma yn Hope-Siloh yn y dyfodol agos i edrych ar y cwestiynau sylfaenol yma.

"O Dduw Dad, dy eiddo di – yw Y Ffordd – awn mewn ffydd ac egni, a'n hysbryd yn llawn asbri, ar y daith i'th garu Di. AMEN" (Beti-Wyn James)

Cinio Blwyddyn Newydd a Gwasanaeth Arbennig

Ar ddydd Sul Ionawr 22 aeth nifer fawr o aelodau'r capel a phlant yr ysgol Sul i'r Clwb Rygbi am ginio i ddathlu'r flwyddyn newydd. Cyn mynd am y cinio cawsom wasanaeth bendithiol iawn yng nghwmni aelodau gweithgar y Pwyllgor Bugeilio a Chyfathrebu.



Yn ystod y gwasanaeth soniwyd am yr holl weithgareddau bugeiliol sydd yn digwydd o fewn y capel e.e ymweld â chleifion a'r henoed, cynnal gwasanaethau cyfrwng Cymraeg yng nghartrefi henoed yr ardal, boreau coffi, y banc bwyd lleol, hanes datblygiad Octavio - bachgen y mae'r capel wedi ei noddi ers yn blentyn bach ynghyd â'r holl elusennau eraill a gefnogir gan yr aelodau o dan arweiniad y pwyllgor. Bu Luned Manon, golygydd Cwlwm, yn olrhain datblygiad y Cylchlythyr. Rydym yn ddiolchgar iawn i Luned a'r holl gyfranwyr am eu gwaith diflino. Braf oedd clywed am yr holl fwrlwm sydd yn y capel a sylweddoli cymaint yw ein cyfraniad i fywyd yn y gymuned leol ac ehangach. Diolch i aelodau'r pwyllgor.

Gair y Gweinidog – William Williams Pantycelyn

Eleni byddwn yn dathlu tri chan mlwyddiant geni William Williams, Pantycelyn. Bardd, emynydd ac awdur rhyddiaith grefyddol oedd William Williams. Roedd yn frodor o blwyf Llanfair-ar-y-Bryn, Sir Gaerfyrddin. Mae'n cael ei adnabod fel 'Pantycelyn' ar ôl enw'r ffermdy bu'n byw ynddo, yn y brynau ger Pentre Tŷ-gwyn. Yn wreiddiol roedd yn bwriadu hyfforddi i fod yn feddyg, ond cafodd droëdigaeth wrth wrando ar Howel Harris yn pregethu yn Nhalgarth yn 1737. Er iddo fod yn gurad i Theophilus Evans am gyfnod, gwrthododd ei urddo yn offeiriad yn Eglwys Loegr yn 1743 oherwydd ei gysylltiadau â'r Methodistiaid.

Roedd yn bregethwr teithiol a daeth yn enwog am ei allu arbennig i arwain seiadau. Ef ynghyd â Daniel Rowland a Howel Harris oedd prif arweinwyr y Methodistiaid yng Nghymru yn y ddeunawfed ganrif. Trwy ei emynau, yn enwedig, ef yw un o'r dylanwadau pwysicaf ar y diwylliant Cymraeg yn y bedwaredd ganrif ar bymtheg a'r ugeinfed ganrif. Claddwyd ef yn Eglwys Llanfair-ar-y-bryn ar gyrion tref Llanymddyfri. Roedd yn awdur toreithog yn y Gymraeg. Ei enw barddol oedd 'Pantycelyn' ond fe'i adnabyddir hefyd fel '*Y Pêr Ganiedydd*' oherwydd dwysder a melysder ei ganu. Ysgrifennodd rai emynau Saesneg e.e. "*Guide me, O thou great Jehovah*". Mae ei gyfraniad i'n Canu Cynulleidfaol yma yng Nghymru yn amhrisiadwy fel y gwelir yn y ffaith fod 88 o'i emynau wedi eu cynnwys yn "*Caneuon Ffydd*" – y nifer fwyaf gan unrhyw awdur.

Yn ôl Dr. Martin Lloyd Jones, a ystyrir yn un o'r pregethwyr mwyaf erioed, Pantycelyn oedd yr emynydd gorau erioed – mewn unrhyw iaith. "*Mae mawredd gan Isaac Watts, a phrofiad yn rhyfeddol gan Charles Wesley, ond gan William Williams ceir y ddau beth ar yr un pryd, a dyna pam rwy'n ei roi ar ei ben ei hun – fe ddysgodd ddiwinyddiaeth i'r bobl trwy ei emynau.*"

“ Iesu, Iesu, rwy't ti'n ddigon,
'rwy't ti'n llawer mwy na'r byd;
mwy trysorau sy'n dy enw
na thrysorau'r India i gyd:
oll yn gyfan
ddaeth i'm meddiant gyda'm Duw.”
(Emyn 320 – Caneuon Ffydd)

Trefn Gwasanaethau (9:45am)

Ebrill 2	Gweinidog (Cymun)
Ebrill 9 (<i>Sul y Blodau</i>)	Gweinidog
Ebrill 14 (<i>Y Groglith</i>)	10.30 Oedfa Gymun Undebol yn Hope-Siloh
Ebrill 16 (<i>Y Pasg</i>)	Gweinidog (Cymun)
Ebrill 23	Mrs Hazel Charles Thomas
Ebrill 30	Gweinidog
Mai 7	Gweinidog (Cymun) (Tabernacl yn ymuno)
Mai 14	Gwasanaeth Cymorth Cristnogol - Aelodau
Mai 21	Gweinidog
Mai 28	Colin Isaac
Mehefin 4 (<i>Pentecost</i>)	Gweinidog (Cymun)
Mehefin 11	Gweinidog
Mehefin 18	Dr Christian Williams
Mehefin 25	Gweinidog

Cyfundeb Dwyrain Caerfyrddin a Brycheiniog

Cwrdd Chwarter

Cynhaliwyd Cwrdd Chwarter yng nghapel Libanus, Pwll, brynhawn Iau 16 Chwefror o dan lywyddiaeth Mr. Peter Harries. Cafwyd cyflwyniadau gan y Parch. Beti-Wyn James a Mr. Alun Lenny ar Eglwys drefol y Priordy, Caerfyrddin ac Eglwys wledig Bwlch-y-Corn. Cynhelir y Cwrdd Chwarter nesaf ddydd Iau 11 Mai yng nghapel Y Sgwar, Penygroes, pan fydd Y Parchedig Ddr. Geraint Tudur, Ysgrifennydd yr Undeb a Dr. Hefin Jones yn trafod Arolwg y Cyfundebau.

Cangen Chwiorydd y Cyfundeb

Cynhelir y gwasanaeth blynyddol yng nghapel Bethania, Tymbl Uchaf, nos Fawrth 25 Ebrill am 7 o'r gloch. Anerchir gan y Parch. Jill-Hailey Harries.

Rhwydwaith Merched Undeb yr Annibynwyr

Cyfarfod yng nghapel y Priordy, Caerfyrddin, bore Sadwrn, 6 Mai, 10.00 – 1.00
Siaradwr gwadd: Arfon Jones – 'Cefnogi ymgyrch Miliwn o Siaradwyr Cymraeg'

Cyngor yr Undeb

Cynhaliwyd cyfarfod o Gyngor yr Undeb yng Ngregynog, Maldwyn ar 10 a 11 Mawrth, a chynhelir cyfarfod o'r Pwyllgor Gweinyddol yn Aberystwyth, 4 Ebrill.

Cyfarfodydd Blynyddol yr Undeb

Capel Gellimanwydd, Rhydaman Mehefin 15-17

Y Bore Coffi – Iris Thomas

Gofynnwyd i mi nôl yn 2008 i drefnu bore coffi misol yn y Festri. Cynhaliwyd y bore coffi cyntaf ar fore Gwener 2 Mai 2008. Y bwriad oedd codi arian i helpu wella adeiladau'r capel, ac yn wir, trwy garedigrwydd aelodau'r capel a ffrindiau selog rydym wedi casglu dros £7,000 erbyn hyn.

Ond mae bore Gwener cyntaf bob mis wedi mynd yn fwy na bore coffi i godi arian – mae e'n fan cyfarfod i'r aelodau a'u ffrindiau. Mae'n braf gweld pobl yn sgwrsio â'i gilydd a chwerthin a mwynhau'r profiad o ddod ynghyd. Mae e'n gyfle i ddod i nabod rhywun, gwneud ffrindiau newydd a dal i fyny â newyddion pawb.

Diolch i bawb sydd wedi helpu yn y gegin a gwneud teisennod blasus o bob math bob mis. Mae gyda ni gogyddion arbennig iawn! Diolch hefyd i'r rhai sy'n rhoi anrhegion i'r raffl. Diolch i Gwen a Marie Lynne am lywio'r cyfarfodydd bob mis ac i Mair Davies a Jean Samuel am edrych ar ôl yr arian. Peth arall sydd wedi dod i'r amlwg yw fod gweithio fel tîm yn hollbwysig ac mae pawb yn elwa.

Dewch bawb i fwynhau'r cwmni a'r hwyl, a'r croeso sy'n eich aros.....a'r teisennod wrth gwrs!
Iris Thomas

Cawn adnabod aelodau, esbonio,
Dros baned ryseitiau,
Mynnu wnawn a mwynhau
Orig â'n ffrindiau gorau.

Harri Williams

Diolchwn yn fawr i Iris am eu gwaith yn trefnu'r boreau coffi dros yr wyth mlynedd ddiwethaf. Jennifer Clarke ac Ann Easter fydd yn eu trefnu yn y dyfodol.

Newyddion

Llongyfarchiadau

Llongyfarchiadau gwresog i Len a Heulwen Rees ar ddatlu eu Priodas Diemwnt yn ddiweddar – chwe deg mlynedd o fywyd priodasol. Dymunwn yn dda iddynt i'r dyfodol.

Cyfarchion Penblwydd

Yn ystod y mis diwethaf mae un o'n haelodau hynaf, sef Mrs Enid Morris, wedi dathlu ei phenblwydd yn 94 oed. Danfonwn gyfarchion penblwydd iddi a'n dymuniadau gorau.

Dymuniadau gorau

Estynnwn ein dymuniadau gorau i aelodau a fu yn yr ysbyty yn ystod y misoedd diwethaf. Mae Mrs Marion Thomas wedi bod yn Ysbytai Treforys a Gorseinon a Mrs Avril Williams a Mrs Gaynor Miles wedi bod yn Ysbyty Treforys. Cofiw'n hefyd am ein holl aelodau sydd mewn cartrefi preswyl neu'n gaeth i'w cartrefi a dymunwn yn dda iddynt.

Cydymdeimlo

Fel eglwys, estynnwn ein cydymdeimlad dwysaf â'r aelodau yma sydd wedi colli perthnasau agos yn ystod y misoedd diwethaf:

- Handel Evans a Nerys Davidson – mam yng nghyfraith a mamgu, Mary Harries
- Carol Griffiths a Denzil John – gŵr a mab yng nghyfraith, Brian Griffiths
- Ann a Bethan Biston – tad a mam yng nghyfraith, tadcu a mamgu, Eric a Norma Biston
- Pat Bishop – ei merch, Lisa
- Alun Evans – modryb, Gwyneth Davies (cyn-aelod)
- Vivian Jones – chwaer, Marion Payne

A chydymdeimlwn yn ddwys gydag unrhyw aelod arall sy wedi colli perthnasau agos.

Plygain

Mae'r arferiad o gynnal Plygain yn ardal Pontarddulais wedi sefydlu ei hun ers 1992. Eleni nos Sul Ionawr 8 oedd y dyddiad a braf oedd gweld Eglwys San Mihangel yn gyfforddus lawn ar gyfer yr achlysur. Rhaid diolch i Iris Thomas sefydlydd gwreiddiol y Plygain am ei gwaith diflino yn hyfforddi'r côr

ac yn trefnu'r gwasanaeth gan sicrhau fod holl gapeli'r ardal yn cael eu cynrychioli. Eleni cafwyd perfformiadau hyfryd o hen garolau Plygain gan gôr cymysg a braf oedd clywed grŵp o ddynion yn morio canu hefyd. Mae'r Plygain wedi cefnogi amryw o achosion da ar hyd y blynyddoedd ac eleni braf dweud iddynt gasglu £200 tuag at Shelter Cymru. Edrychwn ymlaen yn eiddgar i'r Plygain yn 2018.

Adeiladau

- Er mwyn arbed glaw rhag treiddio trwy ffenestri plwm blaen y capel, gosodwyd 'polycarbonate guards' arnynt ddechrau'r flwyddyn. Rydym hefyd wedi gorfod rhoi elfennau gwresogi newydd o dan rai o seddau'r capel lle mae'r gwreiddiol wedi methu.
- Mae pob teclyn trydanol yn y capel (dros hanner cant ohonynt) wedi mynd trwy'r broses flynyddol o 'PAT Testing' er mwyn sicrhau eu bod yn ddiogel i'w defnyddio.
- Rydym yn y broses o ddiweddarau ein systemau rhagofal tân.
- Oherwydd bod cyflwr yr hysbysfwrdd ar wal blaen y capel yn dirywio, rydym yn edrych ar opsiynau i osod rhywbeth newydd a phriodol yn ei le.

Ein Statws Fel Elusen

Er mwyn diogelu ein hymddiriedolwyr, ynghyd ag asedau'r Eglwys, yn dilyn cais gennym, mae'r Comisiwn Elusennau bellach yn ein cydnabod fel 'Sefydliad Corfforedig Elusennol'. Fel canlyniad mae gennym 'ddogfen rheoli' newydd sydd yn addas a phriodol i'n Heglwys ni fel y mae heddiw. Esbonnir hyn ymhellach mewn Cwrdd Eglwys maes o law. Pwysleisir y bydd modd i ni newid a / neu addasu ein dogfen rheoli newydd petai angen (o fewn terfynau cyfreithiol). Er mwyn i bob aelod gael y cyfle i'w darllen cyn y Cwrdd Eglwys, byddwn yn rhoi'r ddogfen ar ein gwefan, ei danfon allan fel atodiad i 'Gyhoeddiadau'r Wythnos' ac yn rhoi copïau ar ein hysbysfyrddau. Bydd croeso i unrhyw aelod dderbyn copi personol trwy wneud cais i'r Ysgrifennydd.

Cip o'r Gorffennol

Fel y nodwyd yn llyfr hanes Hope-Siloh, erbyn canol y bedwerydd ganrif ar bymtheg, profodd Pontarddulais a'r Hendy rym rhyfeddol penllanw'r Chwyldro Diwydiannol. O fewn yr ardal sefydlwyd rhwydwaith o heolydd a rheilffyrdd newydd, agorwyd gweithfeydd tun ac alcarn a suddwyd pyllau glo. Dyma gyfnod chwyddo'r boblogaeth yn sylweddol wrth i fewnfudwyr gyrraedd er mwyn manteisio ar y cyfleoedd newydd am waith cyson. Mewn cyfraniad i'r **Tyst** (20 Tachwedd 1868), mae Ioan Rhys yn cwyno fod yr Annibynwyr ar ei hôl hi gydag adeiladu capel i'w henwad ym Mhontarddulais ar yr adeg cyffrous yma.

"Nid wyf yn meddwl fod un lle a mwy o ysbryd adeiladu ynddo na'r lle hwn. Gallwn feddwl hefyd nad ydyw y bobl yn ymfoddlonni ar gael adeiladau iddynt eu hunain i breswyllo ynddynt ond eu bod yn penderfynu cael adeiladau i'r Arglwydd eu Duw hefyd. Clywais fod y Bedyddwyr yn bwriadu adeiladu capel newydd yn agos iawn i'r lle. Rhyw le hynod ar y pen yna ydyw. Er ei fod yn un o'r pentrefydd mwyaf yn yr ardal, eto i gyd nid oes yr un capel gan yr un enwad ynddo oddieithr un bychan gan y Wesleyaid, yr hwn sydd mewn man mor hynod fel nad ydyw yn bosibl ei weled heb fyned yn un swydd i chwilio amdano. Mae y Methodistiaid wedi rhagflaenu yr holl enwadau yn y lle yma fel mewn lleoedd eraill yn gyffredin. Mae ganddynt gapel hardd ar gael ei orphen yn ymyl y gwaith, yn y lle mwyaf cyfleus a allasant gael. Mae yr Eglwys wrthi ar ei gorau yn adeiladu. Ac nid ydyw yr Annibynwyr heb fod yn sôn am adeiladu hefyd ond yr wyf yn meddwl eu bod yn ymfoddlonni ar sôn yn unig gan eu bod yn sôn erys misoedd lawer. Hwyrach yr adeiladant gapel da ryw gyfnod ond gan mai yn awr y mae yr ysbryd adeiladu yn awr y dylai y gwaith gael ei ddechreu. Rhy fach o'r haner o ysbryd adeiladu fel enwad sydd yn meddiannu yr Annibynwyr. Mae yn rhaid fod ganddynt hwy lonaid capel o bobl mewn golwg cyn y gosodant gareg ar gareg. Ond, bobl anwyl, paham na allem ni fentro ar gapel newydd pan na fyddo genym ond hanner ei lonaid mewn golwg yn ogystal ac eraill? Ond nid oes achos i bobl Pontarddulais ofni na chant bobl i'w capel hwy gan fod capelaid o bobl yn barod yn disgwyl amdano, y rhai sydd bresenol fel defaid heb gorlan yn crwydro i wahanol gorlannau. Mae yn drueni na chymmerai rhyw un y gorchwyl mewn llaw yn bur fuan."

Ac ymhen blwyddyn wrth gwrs fe adeiladwyd Capel gwreiddiol yr Hope yn y pentref. Faint o ddylanwad gafodd llythyr Ioan Rhys ar y penderfyniad yma?

Eglwysi Cymraeg Pontarddulais a'r Cylch

Ebrill 14	Gwasanaeth Undebol Dydd Gwener y Groglith yn Hope-Siloh am 10.30
Ebrill 27	Ymdrech Arbennig yn Hope-Siloh am 6.00
Mehefin 29	Tê Croeso yn y Tabernacl am 4.30

Wythnos Cymorth Cristnogol 14 – 20 Mai

Dydd Gwener Mai 12	Cinio bara a chaws 11.30 – 1.30 yn Hope-Siloh
Dydd Sul Mai 14	Gwasanaeth Cymorth Cristnogol yn Hope-Siloh
Nos Fawrth Mai 16	Gwasanaeth Dwyieithog yn Eglwys San Mihangel
18 -20 Mai	Casgliadau Stryd

Apêl Argyfwng Dwyrain Affrica

Byddwch yn ymwybodol o'r argyfwng sy'n wynebu gwledydd Ethiopia, Kenya, Somalia a De Swdan, gyda 16 miliwn o fywydau mewn perygl oherwydd newyn. Disgrifir y sefyllfa fel yr argyfwng dyngarol gwaethaf ers 1945. Ar Ebrill 2, yn ein hoedfa gymun nesaf, bydd y casgliad rhydd yn mynd i'r Apêl. Byddwn yn sianelu'r cyfanswm a godir gennym trwy DEC, sef Disasters Emergency Committee. Yn dilyn yr oedfa, bydd tê a choffi, a stondin chacennau gan blant ac ieuenctid yr Ysgol Sul.

Y Plant a'r Ieuenctid - Lluniau

Bu plant yr Ysgol Sul a'n hieuenctid yn cystadlu fis Ionawr yng Nghystadlaethau Chwaraeon MIC yng Nghaerfyrddin. Llongyfarchiadau i'r Tîm Pêl Rwyd Uwchradd ar ennill eu cystadleuaeth a dod â'r darian yn ôl i Hope-Siloh am y trydydd tro'n olynol. Ac am y tro cyntaf, enillwyd tarian y Pêl Droed Cynradd gan blant Hope-Siloh hefyd.



Criw y Clwb Ieuenctid yn y capel..... ac yn mwynhau noson gyri!



Blaenrybudd..... Y bwriad yw trefnu Trip Ysgol Sul (ar fws) i Ddinbych y Pysgod ar Orffennaf 1af. Cadwch y dyddiad yn glir. Byddwn yn casglu enwau yn fuan!

Gwaith y diweddar Brian Griffiths

Priodwyd Brian a Carol yng Nghapel yr Hope a bedyddiwyd eu meibion, Benjamin a Jonathan, yno.

Brian fu'n gyfrifol am bob llechen ar doeau adeiladau Hope-Siloh, yn cynnwys y brif eglwys a'r festrïoedd. Un cyfraniad pwysig a wnaeth oedd achub nenfwd y festri fawr yn dilyn storm a rwygodd y tô. Diogelodd y nenfwd agored yn syth gyda tharpolin, cyn ail-adeiladu'r trawstiau a'u cryfhau a sicrhau eu bod yn fwy effeithlon nag o'r blaen, cyn rhoi llechi newydd.

Gwnaeth waith sylweddol hefyd ar Eglwys Sant Teilo a gwaith cynnal a chadw ar doeau Capel y Gopa ac ar hen adeiladau Siloh. Bu hefyd yn gweithio ar eglwysi a chapeli eraill ar draws de Cymru.

Nadolig Hope-Siloh

Daeth cynulleidfa fawr o aelodau a ffrindiau ynghyd ar fore Sul Rhagfyr 18 i ymuno â phlant a ieuenctid Capel Hope-Siloh Pontarddulais i ddathlu Gŵyl y Geni. Yr ieuenctid o dan arweiniad graenus Siôn Tiplady fu'n gyfrifol am ein tywys drwy'r gwasanaeth. Fe gafwyd cyflwyniadau llawn hiwmor ond a oedd yn cynnwys neges bwrpasol a oedd yn sicrhau ein bod yn gwir gofio neges y Nadolig. Fel pob blwyddyn bu edrych ymlaen at berfformiad y plant hŷn a'r lleiaf. Hanes Babwshka a gyflwynwyd gan y plant hŷn ac yna stori'r geni gan y plant lleiaf. Rhaid diolch i Marie Lynne a holl athrawon yr Ysgol Sul ac arweinwyr y Clwb Ieuenctid am eu gwaith caled a diflino.



Yn goron ar y diwrnod crewyd naws arbennig gan griw o'n haelodau yn y Gwasanaeth Golau Cannwyll. Tywyswyd ni gan gerddoriaeth, carolau a darlleniadau Nadoligaidd yn ogystal â chyfeiriadau a darlleniadau a oedd yn ein hatgoffa o'r erchyllderau sydd yn digwydd yn ein byd ni heddiw. Rhaid diolch i Gwen Jones am drefnu'r gwasanaeth ac i Eric Jones am ei gyfraniad cerddorol gwerthfawr i'r gwasanaethau. Bu'r gwasanaethau yma yn gyfle i ni fel capel gefnogi Apel Lesotho a'r Yemen.

Parti Nadolig yr Ysgol Sul.....

